

दिनांक 30.10.2024
समय: 18.45 बजे
आकाशवाणी जयपुर-अजमेर
प्रादेशिक समाचार

- राज्य की सात विधानसभा सीटों में उपचुनाव सारू 69 उम्मीदवार मैदान में—13 नवम्बर ने वोट पड़ेला।
- पांच दिन का दीवाली का त्यौहार की कड़ी में आज छोटी दीवाली मनाई जा रही है—राज्य में सैर-सपाटा की ठोड़ों में मोटी तादाद में सैलाणी दीवाली मनावण सारू पूरा रह्या है।
- राज्य सरकार एक नवम्बर ने छुट्टी को ऐलान कीनी— सरकारी कर्मचारियों का मकान किराया भत्ता में बढ़ोतरी।
- लौह पुरुष सरदार वल्लभ भाई पटेल की जयंती का सिलसिला में प्रदेश में आज ई राष्ट्रीय एकता कार्यक्रम राखी जा।

000

राज्य का 7 विधानसभा हलकों में 13 नवंबर ने देवण वाला उप-चुनाव में 69 उम्मीदवार चुनाव मैदान में है। सब कुं बत्ता 12-12 उम्मीदवार दौसा अर खींवर विधानसभा हलकों में है। ई रे अलावा झुंझुनू में 11, रामगढ़ अर चौरासी में 10-10, देवली-उनियारा में 8 अर सलूबर में 6 उम्मीदवार चुनाव मैदान में है। आं में दस महिला उम्मीदवार है। सब कुं बत्ती 3 महिला उम्मीदवार सलूबर विधानसभा हलका में है। ई सागे गई अनुसूचित जाति वर्ग का सात अर अनुसूचित जनजाति वर्ग का 23 उम्मीदवार चुनाव लड़ रह्या है। उप चुनाव सारू भरी जा 118 पर्चा में कुं 91 मंजूर करी जा, 11 नामपाना खारिज कर दिया जा जद के 16 उम्मीदवार नाम पाछा ले लीना। आज नाम पाछा लेवण की आखिरी तारीख ही। दौसा में 5, देवली-उनियारा अर झुंझुनू में 3-3, चौरासी अर खींवर में 2-2 अर रामगढ़ में 1 उम्मीदवार नाम पाछो ले लीनो। सात ई विधानसभा हलकों में उप चुनाव रे दौरान स्वतंत्र, निष्पक्ष अर बिना डर्या वोट देवणो तैय करण सारू 1 हजार 938 मतदान केन्द्रों में कुं 1 हजार 122 केन्द्रों में वोट देवण की प्रक्रिया की लाइव वेबकास्टिंग करी जावेला। आं हलकों में 735 मतदान केन्द्रों की संवेदनशील मतदान केन्द्र का तौर कुं पिछाण करी जायी है। ई बीच निर्वाचन विभाग उड़न दस्तां अर दूजी निगरानी टीमां सागे आबकारी अर परिवहन विभाग समेत न्यारी-न्यारी एजेंसियां ने गैर-कानूनी नकदी, शराब अर दूजा मुफ्त सामान बांटण कुं रोकण सारू कार्यवाही तेज करण का हुकम दीना है। ई बीच पुलिस प्रशासन ई उप-चुनाव कुं जुड़ी तैयारियां में लाग्योड़ो है। डूंगरपुर जिला का चौरासी विधानसभा हलका में उप-चुनाव ने ध्यान राखता थकां पुलिस अर सीआरपीएफ का जवान आज चौरासी विधानसभा हलका का न्यारा-न्यारा गांवों में फ्लेग मार्च निकाल्यो। ई दौरान जनता कुं बिना डर्या, शांति सागे वोट देवण की अपील कीनी। दूजी कानी उपचुनाव वाला हलकों में वोट देवण को प्रतिशत बधावण सारू जाग जगावण बाबत न्यारा-न्यारा कार्यक्रम राख्या जा रह्या है। टोंक में आज महिलाओं की ओर कुं जागरुकता रैली अर कलश यात्रा रे मार्फत वोट जरूर देवण को संदेश दियो जा।

000

पांच दिन का त्यौहार दीवाली का तहत आज छोटी दीवाली मनायी जा रही है। इण ने रूप चौदस अर नरक चौदस का तौर कुं जाणी जावे है। आज न्यारी-न्यारी ठोड़ों जातरु तळावां में पवित्र स्नान कर र धन, धान्य अर सुख-समृद्धि की कामना कीनी। आज रूप चौदस रे मौके पाली में महिलाओं हाथों में मेहंदी लगवायी। दीवाली रे मौके मंदिरों, बाजारों अर कारोबारी प्रतिष्ठानों में रंग-बिरंगा सजावटी सामान, दीयों अर एलईडी लाइटों की जगमगाहट घणी सोहवणी निजर आ रही है। कई ठोड़ों परम्परागत रंगोली अर मांडणा ई माण्डी जा है। और जाणकारी म्हाणा खबरनवीस कुं—'

.....

दीवाळी रा त्यौहार रे मौके बाजारां मांय रंग-बिरंगी झालरां अर लाइटां सागे न्यारी-न्यारी थीम माथे सजावट करी ज्यी है। दीवाळी रा त्यौहार ने ध्यान राखता थकां जयपुर शहर मांय आज ऊं 2 नवम्बर ताई आवण-जावण री व्यवस्था मांय बदलाव करी ज्यो है। पाली मांय देवस्थान विभाग रा सोमनाथ महादेव मंदिर मांय खास सजावट सागे आरती, अन्नकूट उत्सव अर खास कार्यक्रम राख्या जा रह्या है। देवस्थान विभाग मंदिर मांय सोहवणी रोशनी ऊं सजावट करण अर अन्नकूट उत्सव रीत रे मुजब मनावण रा हुकम दीना है। जैसलमेर मांय लोकदेवता बाबा रामदेव रा मंदिर मांय भांत-भांत रा फूलां ऊं सजावट करी ज्यी है। सीमा सुरक्षा बल-बीएसएफ री ओर ऊं सरहद रा पहरेदारां अर वां रा पिरवार वाळां सारू दीवाळी मेळो लगायो जा रह्यो है। भरतपुर मांय आज दीपावली महोत्सव रा तहत जिला प्रशासन री ओर ऊं सुजान गंगा नहर माथे दीपदान रो कार्यक्रम राख्यी ज्यो। सिरौही जिला रा माउंट आबू मांय पड़ौसी राज्य गुजरात सागे ही देश रा न्यारा-न्यारा हलकां ऊं सैलाणी दीवाळी मनावण सारू आ रह्या है। पेश है म्हाणा खबरनवीस री रपट-

.....

लोक सभा अध्यक्ष ओम बिरला, राज्यपाल हरिभाऊ बागडे अर मुख्यमंत्री भजनलाल शर्मा जनता ने दीवाळी अर आवता पर्व-त्यौहारां री शुभकामनावां दीनी है। राज्यपाल दीवाळी, गोवर्धन पूजा अर भैया दूज रा सिलसिला मांय शुभकामना संदेश देता थकां कह्यो के ओ त्यौहार अन्धारा माथे रोशनी री जीत री निशाणी है। मुख्यमंत्री वां रा संदेश मांय कह्यो के दीयां रो ओ त्यौहार अन्याय अर शोषण रे खिलाफ न्याय अर संघर्ष री जीत रो उत्सव है।

मुख्यमंत्री जनता ऊं भगवान श्रीराम रा आदर्शां ने जिन्दगी मांय उतार र बेसहारा लोगां री मदद करण रो संकल्प लेवण री अपील कीनी। न्यारा-न्यारा जिलां रा कलेक्टर ई जनता ने दीवाळी री शुभकामनावां देता थकां त्यौहारां रे मौके भाईचारा बणायो राखण री अपील कीनी है। हनुमानगढ रा जिला कलेक्टर कानाराम ई मौके लोगां ऊं नशो नी करण री अपील करता थकां मुख्यमंत्री आरोग्य योजना मांय नाम मण्डावण री अपील कीनी।

.....

चूरू रा जिला कलेक्टर अभिषेक सुराणा जनता ऊं गारा रा दीया अर स्थानीय कारीगरां कानी ऊं बणायी ज्या सामान री खरीदी री अपील कीनी।

दीवाळी विद माय भारत री पहली वर्षगांठ रे मौके ई प्रदेश मांय न्यारा-न्यारा कार्यक्रम राख्या जा रह्या है। सवाईमाधोपुर मांय नेहरू युवा केंद्र अर कन्फेडरेशन ऑफ ऑल इंडिया ट्रेडर्स री ओर ऊं महावीर पार्क, अंबेडकर सर्किल अर सब्जी मंडी चौराहा रे आरे-सारे नौजवान श्रमदान कीनो। ई मौके साफ-सफाई रा बारा मांय जाग जगायी ज्यी अर लोगां ने शपथ दिरायी ज्यी। पुलिस महानिदेशक उत्कल रंजन साहू दीवाळी रे मौके पुलिस री ओर ऊं जनता री जिंदगी मांय खुशहाली अर समृद्धि री मंगलकामना कीनी है। डी.जी.पी. वां रा संदेश मांय कह्यो के राजस्थान पुलिस प्रदेश मांय शांति अर कानून-व्यवस्था बणायी राखण, अपराधां माथे काबू करण अर जनता री हिफाजत सारू सगळा जरूरी जतन कर रही है। सवाईमाधोपुर री एस.पी. ममता गुप्ता ई जनता ने दीवाळी री शुभकामनावां देता थकां सांप्रदायिक सौहार्द बणायो राखण अर प्रदूषणमुक्त ग्रीन आतिशबाजी करण री अपील कीनी है।

000

त्यौहारां रे मौके मुसाफिरां री बत्ती तादाद ने ध्यान राखता उत्तर पश्चिम रेलवे री ओर ऊं 48 खास गाड़िया चलायी जा रही है। ई सागे ई न्यारी-न्यारी रेलगाड़ियां मांय कुछ बगत सारू 148 डिब्बा और जोड़ी ज्या है। उत्तर-पश्चिम रेलवे रा मुख्य जनसंपर्क अधिकारी कैप्टन शशि किरण आ जाणकारी दीनी। वे बतायो के दीवाळी अर छठ पूजा समेत न्यारा-न्यारा त्यौहारां रे मौके मुसाफिरां री बत्ती तादाद ने ध्यान रखता थकां व्यवस्थावां चाक-चौबंद राखण बाबत खास अभियान चलायो जा रह्यो है।

ई रा तैत चालती गाड़ी मांय चढबा री कोशिश करण वाळां ने रोकण सारू प्लेटफॉर्म माथे रेलवे सुरक्षा बल रा और जवान तैनात करी ज्या है।

.....

000

राज्य सरकार दीवाळी रे मौके 1 नवंबर ने छुट्टी रो ऐलाण कर दीनो है। सामान्य प्रशासन विभाग रा शासन सचिव जोगाराम ई बाबत् हुकम जारी कर दीना है। राज्य सरकार सरकारी कर्मचारियां रा आवास भत्ता—एचआरए मांय बधोतरी रो ई फैसलो कीनो है। मानी महकमा री ओर ऊं जारी हुकम रे मुजब वाय श्रेणी रा शहरां रा कर्मचारियां ने 20 जद के जेड श्रेणी रा शहरां रा कर्मचारियां ने 10 फीसदी आवास भत्तो मिलेला।

000

काल लौह पुरुष सरदार वल्लभ भाई पटेल री जयंती मणायी जावेला। ओ दिन राष्ट्रीय एकता दिवस रा तौर ऊं ई मणायो जावेला। ई मौके मुख्यमंत्री भजनलाल शर्मा वां रा संदेश मांय कह्यो के सरदार पटेल देश ने एक राखण मांय खास काम कीनो। वे कह्यो के आज रो मोटो, एक अर सुनहरो भारत सरदार पटेल री कूटनीति अर दूर री सोच रो नतीजो है। मुख्यमंत्री जनता ऊं देश री एकता अर अखण्डता बणायी राखण सारु भाईचारा री भावना मजबूत करण बाबत् कह्यो। सरदार पटेल री जयंती रा सिलसिला मांय देश मांय सतर्कता जागरुकता सप्ताह मनायो जा रह्यो है। आज बीकानेर मांय पंजाब नेशनल बैंक री ओर ऊं वॉकेथॉन राख्यी ज्यी। केन्द्रीय विधि अर कानून मंत्री अर्जुनराम मेघवाल हरी झंडी बता र वृद्धजन भ्रमण पथ रे आगे ऊं वॉकेथॉन ने रवाना कीनी। ई मौके मेघवाल कह्यो के देश री बरकत मांय हर एक रेहवासी रो खास काम है। राष्ट्रीय एकता दिवस रा सिलसिला मांय आज प्रदेश रा केई जिलां मांय कार्यक्रम राख्यी ज्यो। नीम का थाना मांय जिला कलेक्टर अहलकारां अर कर्मचारियां ने शपथ दिरायी।

000